

3 Proklamasi Darurat belum mansuh Utusan Online Julai 13, 2011

KUALA LUMPUR 12 Julai – Sehingga ke hari ini, kerajaan masih belum memansuhkan tiga Proklamasi Darurat daripada empat yang dimasyhurkan oleh Yang di-Pertuan Agong sejak merdeka memandangkan ia masih relevan dalam memelihara keselamatan negara, ketenteraman awam dan membanteras jenayah.

Timbalan Menteri di Jabatan Perdana Menteri, Datuk Liew Vui Keong berkata, proklamasi itu adalah Proklamasi Darurat 1966 di Sarawak, Proklamasi Darurat 1969 di seluruh Persekutuan dan Proklamasi Darurat 1977 yang diisytiharkan di Kelantan.

“Proklamasi Darurat pada 1964 telah terbatal secara implikasi oleh Proklamasi Darurat 1969 sebagaimana yang diputuskan oleh ‘Privy Council’ dalam kes Teh Cheng Poh lawan Public Prosecutor (1979),” katanya pada sidang Dewan Negara hari ini.

Beliau menjawab soalan Senator Dr. S. Ramakrishnan yang ingin tahu mengapa kerajaan masih belum memansuhkan beberapa Proklamasi Darurat yang diisytiharkan sejak kemerdekaan negara di bawah Perkara 150 Perlembagaan Persekutuan.

Dalam soalan tambahannya pula, Ramakrishnan mempersoalkan tindakan kerajaan pada 2 Julai lalu yang menahan seorang pemimpin politik pembangkang serta lima ahli pertubuhan bukan kerajaan (NGO) ekoran perancangan mereka dalam perhimpunan haram Gabungan Pilihan Raya Bersih dan Adil (Bersih).

Menjawab persoalan itu, kata Vui Keong, penangkapan kesemua enam individu berkenaan dibuat polis kerana terdapat bukti menunjukkan mereka terlibat dalam aktiviti yang boleh mengganggu ketenteraman serta keselamatan awam.

Sebagai rekod, polis pada 2 Julai lalu mengumumkan telah menahan enam orang termasuk Ahli Parlimen Sungai Siput, Dr. D. Jeyakumar dari Parti Sosialis Malaysia di bawah Seksyen 3 (1) Ordinan Darurat (Ketenteraman Awam dan Mencegah Jenayah) 1969 kerana dipercayai terlibat dalam anasir-anasir subversif.

Berdasarkan maklumat dan risikan pihak berkuasa, penahanan enam orang itu mempunyai penglibatan dengan pihak dari luar negara.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=0713&pub=Utusan_Malaysia&sec=Parlimen&pg=pa_03.htm